

Mi tambe t'ei!

Mayoria hende den nan bida a yega di eksperensia un deseo pa demostrá ku nan tambe ta konta, serka nan mes òf serka otronan. Kada persona tin un nesidat profundo pa ta signifkativo, kon ku bo mir'é. Pa definishon, un hende ku ta parse manera kos ku e no ta konta, lo no sinti su mes bon. E nesidat interno pa tin efekto ta oumentá e ora ei.

Di mes esaki ta dependé di kada persona i situashon. Tin hende ku semper ta kòrta pasa den rei den supermarket. Otronan ta yuist hala atras síkikamente òf físikamente na momentu di resistensia òf tenshon. Tin esnan tambe ku hinter nan bida ta metí den un lucha tenas pa atenshon di nan mayornan. Tin otronan tambe ku ta hunga hefe na trabou òf den nan famia. E proseso akí ta kuminsá ku mucha fo'i riba plenchi di hunga kaba. Segun ku bo ta bira adulto, si tur kos ta bon, bo ta siña dominá e deseo ei pa demostrá ku bo tambe ta konta. Esaki no ta nifiká ku e lo disparsé. Si ta bon, e deseo akí lo no stür bo siegamente, pero lo bo sa di uza esaki na e momentu ku e ta realmente nesario. Esaki no ta fásil semper.

Esaki ta konta mas ainda pa komisarionan. Pa nan ta tres biaha mas difísil. Un komisario ku semper ta keda boka será no ta sirbi. Nan lo remplas'é mashá lihé. Niun hende no ta fasiná pa e pensamentunan interior indudablemente hopi importante ku e persona akí tin. T'asina ku nan no ta keda ekspresá. Ke men, bo no tin nada na esaki. Un hunta yen di machonan alfa tambe ta desastroso. Esaki tampoko lo bo no ke. Na di dos lugá, un komisario pa definishon tin un tarea paradoksal. E mester ta persona di resonansia, fuente di informashon i konsehero pareu. Tambe e mester drecha un situashon ku ta bayendo robes na e momentu adekuá. Tin biaha esaki ta eksigí intervenshon. Esaki lo por hasi daño na e relashon ku direktiva. Ke men un barí yen di kontradikshon. Na di tres lugá, mashá tiki biaha e komisario ta presente. Hasta ku dies òf diesdos reunion pa aña (loke ya kaba ta hopi) ta un par di ora pa luna so bo ta hañ'é den e empresa. I durante esun par di oranan ei tur kos mester sosodé, e tríptiko di kontrolá, ta doño di trabou i persona di resonansia. Esaki ta un bentana bastante chikí pa un interakshon di tarea importante asina. Esaki ta resultá den huntanan di komisario ku tin biaha ta blo keda laga mira ken ta 'na kabes'. Esaki ta konta riba nivel individual tambe. Un komisario individual sa bon bon ku e no por keda ku boka será durante tur e tres oranan ku un reunion dura. Ke men e mester laga su bos zona. Hopi biaha e mekanismo akí ta resultá den strobansa di e tumamentu di desishon. E ora ei bo ta hañabo ku esnan ku tur ora bai ke kompartí ku tur hende, e pensamentunan ku ta sumamente importante pa spesialmente nan mes i e grupo di esnan ku mayoria biaha no ta bisa nada i ku ta solamente trese dilanti ku den e nótulonan a skibí un palabra inkorektamente ku 'd' na lugá di un 't'.

Anto e ora ei ainda bo ta hañabo ku dinámika di e hunta mes tambe. Promé ku bo ke bisa djaka rabu stòmpi, personanan den e hunta ta kuminsá batayá ku otro riba kabes di gerensia. E empresa ta bira víktima e ora ei.

Un sugerensia ta pa kuminsá dediká mitar di e reunion na un kòmbersashon tokante funshonamentu konhunto den término di 'mi tambe t'ei ainda'. E ora ei bo ta diskutí si tur hende ta haña suficiente chèns pa trese nan opinion dilanti.

Bo ta diskutí tambe si e loke ta keda tratá ta realmente importante pa e empresa, òf spesialmente pa persona. E ora ei bo por hasi palabrashon tokante e tópikonan ku (presidente) ta trata lihé lihé i e asuntunan ku ta realmente di interes. Si bo por yega na un akuerdo riba esaki, e ora ei lo bo bai funshoná hopi mas mihó. I tur hende t'ei ainda tambe!



[Frank Kunneman](#)

VanEps Kunneman VanDoorne
Attorney at law | Partner

T +5999 461 3400 ext. 254

E kunneman@vandoorne.com
